

# PSOE Filesa eta Time Exporten bidez finantzatu zela baieztu dute perituek

Enpresa hauek jasotako 1.000 milioi pezeta alderdi sozialistarentzat izan ziren

**M**arino Barbero 'Filesa Mauziko' epailearen aginduz PSOEren agiriak aztertu dituzten perituek baieztu egin dute alderdi sozialista Filesa eta Time Export enpresen bitartez finantzatu zela. Guztira, Filesak 1.000 milioi pezeta jaso zituen PSOEren hornidura gastuak ordaindu ahal izateko.

MADRIL

Aurretik pentsatzen zena baieztu zuten atzo ofizialki Barbero epailearen aginduz PSOEren agiriak ikertu dituzten perituek. Agiri horiek PSOEren Ferraz kaleko egoitzan, Espainiako Bankuan eta beste banketxe batzuetan egindako miaketetan eskuratu zituen Barberok.

Perituen arabera, Carlos Navarro diputatua eta Josep Maria Sala senadorea Filesa eta Time Exporteko buru zirela, bi enpresa hauek 1.000 milioi pezeta (50 miliar libera) jaso zituzten sekula egin ez ziren txosten teknikoan truke. Faktura faltsuekin justifikatutako diru hori PSOEren eskuetara iritsi zen.

Guzti honengatik, PSOEko finantza arduradunek ustezko zerga delitua egiteagatik auzipetu ditzakete, jasotako 1.000 milioi pezeta horiek ez baitzizkioten Haziendari aitortu. Orotara, 300 milioi pezeta utzi ditu PSOEak aitortzeke. Honez gain, faktura faltsuak egiteagatik merkataritza



Josep Maria Sala PSOEko senadorea Barberoren aurrean deklaratu zuen egunean.

EFE

agiriaren faltsuketa leporatu dazkieke burukide sozialistei. PSOEri dirua eman zioten enpresen artean BBV eta Central bankuak, Cepsa, Enasa, ABB Energia, Pryca, Catalana de Gas, Focsa eta Tecnholding daude.

Perituen txostena fiskalari, defentsari eta akusazioei aurkeztu ondoren, Barberok Sala eta Navarro auzipetzeko beharrezkoa den suplikatorioa eskatuko duen ala ez erabaki behar du orain.

Peritoen txostenaren lehen atalean ikusten denez, Filesa eta Time Exportek PSOEekin loturiko bost enpresa hornitzailei —Hauser y Menet, El Viso Publicidad, Seinlosa, Producciones Dobbs eta Mabuse— dirua eman zieten, baina txosten teknikoan egitearekin zerikusirik ez zuten produktuen truke. Produktu horiek Filesa eta Time Exportek ordaindu arren, PSOErengana iritsi ziren.

PSOEek Kontu Auzitegiari

emandako txostenak eta Marino Barberok sozialisten egoitzan aurkitutakoak desberdinak direla ere azpimarratu dute perituek.

Perituen txostenaren berri jakin bezain laister, Marcos Garcia Montes herri akusazioko abokatuak Carlos Navarro eta Josep Maria Salaren suplikatorioak eskatzeko ordua dela adierazi zuen atzo, bere ustetan frogatua baitago alderdi sozialistak bere esku zeuden Filesa eta Time Exporten bitartez dirua jaso zuela.

## Irregularitasunak Navarro eta Salarekin hasi ziren Filesan

MADRIL

Filesa eta Time Export enpresen ekintza irregularrak Carlos Navarro diputatua eta Josep Maria Sala senadorea sozialistek erosi zituztenean hasi zirela diote peritu judizialek, atzo jakitera emandako txostenean ikus ahal denez.

PSOEren agiriak aztertu ondoren egindako txostenean perituek diotenez, «1987tik aurrera Sala senadorea eta Navarro diputatua Time Export erosi zituztenean, enpresa aurretik egiten ez zituen ekintzak egiten hasi zen. Hala nola, Time Exportek eta gerago ere Filesak, existitzen ez ziren txostenak fakturatzeko zizkieten bezero jakin batzuei. Diru hau alderdi sozialistak erabiltzen zituen enpresa hornitzaile batzuen gastuak ordaintzeko erabiltzen zuten».

'Filesa auzia' dela eta, beren kontrako kereila dituzten Luis Olivero eta Alberto Floresek Filesa eta Time Exporteko administrazioaz «formalki» arduratu zirela diote perituek, baina beren kudeaketan ere aritu zirela baieztu dute.

Josep Maria Sala eta Carlos Navarro Filesa eta Time Exportera iritsi aurretik, bi enpresa hauek beste negozio batzuetan aritzen zirela ziurtatu dute PSOEren eta Espainiako Bankuaren egoitzak miaztean Marino Barbero epaileak aurkitu zituen txostenak aztertu dituzten perituek.

## Aznar: «Frantzian moduan gertatuko da Espainian»

DONOSTIA

Frantzian bezala, datozen hauteskundeetan Espainian ere alderdi sozialistak porrot handia izango duela iragarri zuen atzo Jose Maria Aznar PPko lehendakariak. Aznarren arabera, Frantziako PSren hondamena eragin duten faktoreak «ustelkeria, langabezia eta sozialisten gaitasunik eza» are larriagoak dira Espainian Aznarren ustetan. Frantziako RPRk eta Espainiako PPk proiektu politiko «antzekoak» dituztela aldarrikatu ondoren, «Espainian ere badaude Frantzian gertatu den aldaketa politikoa gertatzeko arrazoiak» ziurtatu zuen.

'El Pais' egunkariak igandean kaleratutako inkestarekin pozik agertu zen burukide eskuindarra, baina PPk ez duela bere estrategia aldatuko esan zuen Aznarrek, «emaitza hauek aurrakusten gertatuko».

Frantziako emaitzek Felipe

### Eskainuen banaketa

|         | 1993(1) | 1989 |
|---------|---------|------|
| PSOE    | 140-152 | 175  |
| PP      | 137-149 | 127  |
| IU-IC   | 26-29   | 17   |
| CIU     | 16-20   | 18   |
| CDS     | 0-1     | 14   |
| EAJ     | 5-6     | 5    |
| HB      | 4       | 4    |
| EA      | 1-2     | 2    |
| EE(2)   | -       | 2    |
| PA      | -       | 2    |
| UV      | 2       | 2    |
| AIC     | 1       | 1    |
| PAR     | 0-1     | 1    |
| ERC     | 1       | -    |
| Berdeak | 0-1     | -    |

(1) El Paisen inkesta

(2) PSOEren barne dago

Gonzalez gogoeta egitera bultzatuko dutela espero zuela adierazi zuen Julio Anguita IUko buruzagiak. Jordi Pujol Kataluniako lehendakariak, berriz, Espainia eta Frantziako alderdi sozialisten krisiak «konparagarriak» direla ziurtatu zuen eta Europa

guztiaz antzerako gertatu dela gogoratu zuen. 'El Pais-en' inkestak CiU bere alderdiari ematen dizkion boto asmoekin gus-tura agertu zen Pujol, «lehen aldiz PSC-PSOEren aurretik jartzen gaituztelako era honetako hauteskundeetan».

**PP ETA PSOE IA BERDINDURIK** Demoscopia institutuak 'El Pais' egunkariarentzat egindako inkestan ikusten denez, azken hilabeteetan ezereztatu egin da PSOEek PPri zion alde. 10.000 pertsona galdetu ondoren egindako inkesta honek dioenez, PSOEek botoen % 33,9 eskuratuko lituzke, 1989ko Legebiltzarrerako hauteskundeetan baino sei puntu gutxiago eta CISEk inkestak zioena baino % 2,4 gutxiago. Boto hauekin, PSOEak gaur dituen 175 diputatuetatik 30 inguru galduko lituzke, 140 eta 152 artean gertuko bailitzateke.


1989an botoen % 25,8 eta 107

eskainu eskuratu zituen PPk PSOEtik gertu gertatuko litzatekeela dio Demoscopia, hauteskundeak orain egingo balira botoen % 33,3 (PSOE baino % 0,6 gutxiago) eta 137-149 eskainu lortuko litzatekeelako. Batez beste datuak hartuta, PSOEek hiru eserlekuko alde besterik ez luke izango PPrekiko.

IUK azkenaldiko inkesta guztietan aurrakusten zaizkion emaitzak erdietsiko lituzke. 'El Pais-en' arabera ezkerreko koalizioak 26 eta 29 diputatu artean izango ditu hurrengo legegintzaldian, orain 17 dituen bitartean. Boto aldetik 2,4 puntu irabaziko lituzke (% 9,1etik % 11,5era).

Espero zen moduan, CDSk orain dituen 14 diputatuak galduko lituzke, edo Madrilen bat lortuko luke. Zentristen botoak PPrantz doaz.

CiUri 16 eta 18 diputatu artean iragarri dizkio inkestak (orain 18 ditu), EAJk bat gehitu liezaieke orain dituen bostei, HB laurak



Jose Maria Aznar.

EFE

gordeko lituzke, EA-EuEk bat edo bi eskuratu, UVk biak gorde eta AICk bakarrari eutsi. Alderdi Andaluzistak orain dituen biak gal litzake eta PAREk duen bakarra gordetzeko zailtasunak izan litzake. ERC Kongresura itzuliko da eta lehen aldiz Berdeek ordezkartza lor lezaket, Madrilen hain zuzen ere.